



Broj: 01- *414* 124

Sarajevo: 8.1.2025. godine

**PREDSTAVNIČKI DOM**

**PARLAMENTARNE SKUPŠTINE BOSNE I HERCEGOVINE**

n/r predsjedavajućeg

*Šemsudin Mehmedović*



BOSNA I HERCEGOVINA  
PARLAMENTARNA SKUPŠTINA BOSNE I HERCEGOVINE  
SARAJEVO

PRIMLJENO: 08-01-2025			
Organizaciona jedinica	Klasifikaciona oznaka	Redni broj	Broj priloga
01-	50-1-	95/	25

**PREDMET:** Zastupnička inicijativa kojom Predstavnički dom Parlamentarne skupštine Bosne i Hercegovine obavezuje Vijeće ministara Bosne i Hercegovine i Ministarstvo pravde Bosne i Hercegovine da, u skladu sa Zakonom o državnoj službi u institucijama Bosne i Hercegovine, preduzmu mjere protiv Josipa Merdže, direktora Instituta za intelektualno vlasništvo Bosne i Hercegovine - rukovodećeg državnog službenika, jer godinama kao državni službenik uporedno obavlja i funkciju glavnog sekretara Hrvatskog narodnog sabora Bosne i Hercegovine, krovne političke organizacije Hrvata Bosne i Hercegovine.

U skladu s čl. 8. Poslovnika Predstavničkog doma Parlamentarne skupštine Bosne i Hercegovine („Službeni glasnik BiH“, br. 79/14, 81/15, 97/15, 78/19 i 53/22) upućujem zastupničku inicijativu,

**Predstavnički dom Parlamentarne skupštine BiH obavezuje Vijeće ministara Bosne i Hercegovine i Ministarstvo pravde Bosne i Hercegovine da, u skladu sa Zakonom o državnoj službi u institucijama Bosne i Hercegovine, preduzmu mjere protiv Josipa Merdže, direktora Instituta za intelektualno vlasništvo Bosne i Hercegovine - rukovodećeg državnog službenika, jer godinama kao državni službenik uporedno obavlja i funkciju glavnog sekretara Hrvatskog narodnog sabora Bosne i Hercegovine, krovne političke organizacije Hrvata u Bosni i Hercegovini.**

### Образложење

Članom 6. Zakona o parlamentarnom nadzoru propisano je da parlamentarni nadzor provodi Parlamentarna skupština Bosne i Hercegovine posredstvom svojih domova, a članom 7. stav 2. istog zakona, utvrđeno je da se parlamentarni nadzor provodi radi preventivne zaštite od nezakonitog djelovanja, zloupotrebe položaja i ovlaštenja, prikupljanja informacija i činjenica o događajima koji se odnose na rad institucija i organa uprave Bosne i Hercegovine.

Josip Merdžo je na 11. sjednici Vijeća ministara, održanoj 11.05.2023. godine, imenovan za direktora Instituta za intelektualno vlasništvo Bosne i Hercegovine na mandat od pet godina, ima status rukovodećeg državnog službenika i imenovan je na drugi mandat. Josip Merdžo već devet godina ima status rukovodećeg državnog službenika, a uporedo s tim godinama obavlja

i funkciju glavnog sekretara Hrvatskog narodnog sabora Bosne i Hercegovine, krovne političke organizacije Hrvata Bosne i Hercegovine koja okuplja stranke s hrvatskim predznakom, kako se navodi na internetskoj stranici HNS-a. Također, Dragan Čović, predsjednik Hrvatske demokratske zajednice Bosne i Hercegovine u pismu Donaldu Trampu, predsjedniku SAD-e, koje je upućeno 6.11.2024. godine, ističe: „Hrvatski zvaničnici djelujući kroz institucije vlasti i okupljeni u Hrvatski narodni sabor Bosne i Hercegovine kao krovnu političke organizaciju i izraz političke volje hrvatskog naroda...“.

**Državni službenik Josip Merdžo godinama u javnosti istupa kao glavni sekretar HNS-a, učestvuje u izbornim kampanjama HDZ-a i HNS-a, iznosi političke stavove u medijima, u radno vrijeme učestvuju u radu HNS-a, a istovremeno kao rukovodeći državni službenik prima odličnu platu i ima službeno vozilo na raspolaganju 24 sata, kao i sve druge beneficije jednog rukovodećeg državnog službenika i direktora institucije Bosne i Hercegovine.**

Kao predstavnik HDZ-a u januaru 2022. godine učestvovao je u Neumu na pregovorima o izbornom zakonu, a nakon pregovora u izjavi za agenciju Fena izjavio: „Ako se ne postigne dogovor o izmjenama izbornog zakonodavstva, bojkot izbora hrvatskih političkih predstavnika, je formalno gledajući, jedna od opcija“. Dana 15. oktobra 2024. godine gostujući na RTV Herceg Bosne, državni službenik Josip Merdžo izjavio je „**Ukoliko se potvrdi presuda u slučaju Kovačević, potrebno je formirati treću federalnu jedinicu**“.

**Nesporno je da je Josip Merdžo visoko rangirani politički funkcioner Hrvatskog narodnog sabora Bosne i Hercegovine, što je je nespojivo sa poslom državnog službenika.** Također, bitno je istaći i činjenicu da je Josip Merdžo 2006. godine pravosnažno osuđen na godinu zatvora zbog krivičnog djela zloupotrebe položaja i ovlasti, te da je u oktobru 2010. godine, Borjana Krišto, tadašnja predsjednica Federacije Bosne i Hercegovine, donijela odluku o pomilovanju Josipa Merdže.

Članom 16. Zakona o državnoj službi u institucijama Bosne i Hercegovine je utvrđeno da državni službenik ne smije obavljati dužnost, aktivnost ili biti na položaju koji dovodi do sukoba interesa sa njegovim službenim dužnostima, a **naročito da državni službenik ne može biti član upravnih i drugih odbora političkih stranaka i ne smije slijediti instrukcije političkih stranaka.** Državni službenik je dužan da prilikom postavljanja na mjesto državnog službenika predočiti sve informacije o djelatnostima i funkcijama koje obavlja.

Zbog svega navedenog, jasno je da je Vijeće ministara Bosne i Hercegovine, protivno Zakonu o državnoj službi u institucijama Bosne i Hercegovine, imenovalo Josipa Merdžu za direktora Instituta za intelektualno vlasništvo Bosne i Hercegovine, kao i da je potrebno da u što kraćem roku Vijeće ministara, u skladu sa članom 50. stav 1. tačka n. Zakona o državnoj službi u institucijama Bosne i Hercegovine razriješi Josipa Merdžu sa dužnosti direktora Instituta za intelektualno vlasništvo Bosne i Hercegovine.

Članom 50. stav 1. tačka n. Zakona o državnoj službi u institucijama Bosne i Hercegovine je utvrđeno: „Državnom službeniku prestaje radni odnos ukoliko se utvrdi da je prilikom zasnivanja radnog odnosa dao neistinite podatke koji su služili kao dokaz u postupku

zasnivanja radnog odnosa i na osnovu kojih je izvršeno postavljenje, ili ukoliko se utvrdi da je u međuvremenu prestao da ispunjava uslove propisane ovim zakonom“.

Također, Ministarstvo pravde Bosne i Hercegovine je dužno da preduzme zakonom utvrđene mjere protiv državnog službenika Josipa Merdže i izrekne prekršajnu kaznu Josipu Merdži u skladu s članom 63.a stav (8) tačka a) Zakona o državnoj službi u institucijama Bosne i Hercegovine

Član 63.a stav (8) tačka a) Zakona: Kaznit će se za prekršaj državni službenik koji javno ispoljava svoja politička uvjerenja.

**Na sjednicu nadležne komisije i sjednicu Predstavničkog doma na kojoj će se razmatrati ova inicijativa, u skladu s članom 11. stav 2. Zakona o parlamentarnom nadzoru, potrebno je pozvati** Borjanu Krišto, predsjedavajuću Vijeća ministara Bosne i Hercegovine, Davora Bunozu, ministra pravde Bosne i Hercegovine i Josipa Merdžu, direktora Instituta za intelektualno vlasništvo Bosne i Hercegovine, da u okviru svojih ovlaštenja, daju informacije vezano za inicijativu i odgovore na pitanja članova nadležne komisije i zastupnika na plenarnoj sjednici doma.

**Napominjem da je članom 11. stav 4. Zakona o parlamentarnom nadzoru** propisano da je pozvano lice obavezno pismenim putem obavijestiti tijelo koje provodi parlamentarni nadzor o razlozima spriječenosti prisustvu najkasnije 48 sati prije početka sjednice.

S poštovanjem,

ZASTUPNIK PS BiH  
Šemsudin Mehmedović

Dostavljeno:

- naslovu
- a/a